


Cronica

dall'uniun da catschadurs Tujetsch



giubileum da 50 onns
1943 – 1993

In plaid sin via

Er'ad in uniun s'aud'ei da festivar siu 50avel onn d'existenza, mintgin da nus festivescha siu 50avel empaui pli special. L'uniun da catschadurs Badus organisescha per quei intent ina digna fiasta per la populaziun da Tujetsch. Dasperas havein nus anflau per opportun da metter a scret empaui dil curriu e passau. Quei duei surtut esser engraziament e renconuschientscha als fundaturs, ed a tuts quels ch'ein daventai meriteivels entras prestar buna lavur en favur da noss'uniun. Biars da quels ch'han surschau a nus quella ierta han fatg il pass tier l'armada gronda.

In giubileum dat denton era la caschun da far resortir il motiv dalla fundaziun:

Suenter ch'ils catschadurs Tuatschins han priu la decisiu da sedistaccar dall'Uniun da catschadurs Muraun", han els anflau per bien da fundar "l'Uniun da catschadurs Badus" e da circumcriver in dils emprems artechels dallas statutas sco suonda: "L'Uniun da catschadurs Badus ha gl'intent da sustener ses commembres e promover l'unitad denter quels". Ei quei buca in grondius propiest? -in ch'ins drova oz forsa pli che zacu!

El temps modern cun siu traffic e sia mobilitad stuein nus ulterioramein procurar pil beinstar da nossas selvaschinas. Quei astga denton mai mo esser in tgirar dalla selvaschina sco tala, mobein da siu entir ambient.

Nus essan engrazieivels d'haver anflau in valent autur per nossa cronica. Cun lavur minuziosa ha il cronist Toni Berther rimnau scartiras, regurdientschas e fotos. Ad el admettein nus in resentiu Dieus paghi. Ussa savein nus presentar als intressai ina interessanta e vasta informaziun sur dil vargau e present.

Als commembres dall'uniun giavischel era pil futur cumentientscha e bia bialas uras da cumpignia e cordialitad. Lein denton sedar tutta breigia dad era mantener per nossas selvaschinas in ambient intact.

Per l'Uniun da catschadurs Badus/Tujetsch

Il president Hans Monn

**Cronica dall'Uniun da catschadurs Tujetsch,
numnada "Badus" 1943-1993**
da Toni Berther, Tujetsch/Cuera

1. Introducziun

1.1 La fauna


Las regiuns allas rivas dil giuven Rein ein segiramein daditg enneu stadas occupadas da selvaschinas, dallas qualas ils habitonts sepatrunavan tenor basegns per francar e meglierar la basa d'existenza. Ins astga bein dir ch'ina buna part dallas specias d'animals selvadis da tschels onns viva aunc oz en las vals dil Rein anterius. Il medem vegn a constar per ils utschals. Dils animals selvadis svani cumplettamein ein da numnar: igl uors, la ludra ed il tschéss-barbet. Il tschéss ni l'evla, retg dall'aria, ei daditg enneu schurmegiaus cumplettamein. Il capricorn era pli baul morts ora el Grischun, el ei returnaus el Parc naziunal entuorn 1910 ed en Tujetsch 1966.



Dus tschéss giuvens da Nalps, entuorn 1940

1.2 Igl uorden

Sch'ei deva gia avon tschentaners in uorden da catscha en nossas regiuns ei grev da dir. Las Treis Ligias, s'unidas ils 21 da mars 1471 a Vazerol, han en mintga cass procurau ch'ils dretgs da catscha mondien naven dils "signurs" vi sin las "vischnauncas" e quei ei stau 1526. Quella midada ha giu nauschas consequenzas sin il diember d'animals.




Cristian Berther cun tgaun e tschéss, atun 1946

Cun l'entrada dil Cantun en la Confederaziun (1803) ein ils dretgs da catscha e pesca i vi sin il cantun. Il cantun Grischun ha relaschau gia 1805 in mandat da catscha, ed ina lescha per propi datescha digl onn 1826. La constituziun federala digl onn 1874 cuntegn artechels pil schurmetg digl uaul, dallas selvaschinas, dils utschals e dils pèschs. La Confederaziun ha relaschau ina lescha da catscha 1876, la quala ha naturalmein giu influenza sin la reglamentaziun cantunala. La catscha "libra" ei stada a fin. Ils catschadurs ein stai obligai da cumprar ina patenta. Il temps da catscha ei vegnius scursanius e prescripziuns da schurmetg ein idas en vigur. Silsuenter ein leschas da catscha federalas e cantunalas adina puspei vegnidias adattadas al basegns dil temps.



Guardia-catscha Luis Jacomet
cun tschéss, entuorn 1940



L'emprema caura-capricorn colonisada en Tujetsch 1966

La reglamentaziun dalla patenta ha se capescha necessitau ina survigilonza. Ei ha ditg dau negin guardia-catscha mo per Tujetsch. Sco "Wildhüter" funcziunava in Maissen da Segnas. El cumpareva en uniforma, fagend sias turas. Als buobs fageva el grond'impressiun.


Sco survigiladers da catscha en Tujetsch han funcziunau entochen oz:




† Luis Jacomet, Sedrun
(guardia catscha 1933-1945)



† Luis Schmid, Zarcuns
(guardia catscha 1946-1974)



Placi Levy, Gonda
(guardia catscha 1975-1988)



Gabriel Monn, Sedrun
(guardia catscha 1989-

1.3 Temps avon l'uniun "Badus"

Suenter il temps dalla reglementaziun (1876) ein tec a tec era las uniuns da catschadurs seformadas en il Grischun. Ils emprems pass da s'unir en la Cadi van segiramein anavos sin il temps avon l'emprema uiara mundiala. Era sch'ils acts correspondents ein scarts, eis'eit tenor la "Bündnerische Jägerzeitung" dils 20 da matg 1914 segir che l'uniun per l'entira Cadi ei vegnida fundada ils 10 da mars 1914 ed ha survegniu il num "Secziun Greina". Alla radunanza da fundaziun a Trun han varga 80 catschadurs priu part. L'uniun cantunala veva quei mument gia 12 secziuns. La Secziun Greina ei dall'entschitta enneu s'engaschada per mantener il sistem da catscha da patenta e d'ereger buns asils per las selvaschinas,

Muort las grondas distanzas en la Cadi er'eit per biars catschadurs interessai malcumadeivel (schliatas communicaziuns, negins vehichels) da prender part allas radunonzas. Igl ei perquei capeivel ch'il patratg da fundar secziuns localas ei prest sefatgs. Gia avon ni entuorn 1930 han ils da Mustér, Medel e Tujetsch bandunau successivamein la Secziun Greina e fundau ina secziun en Sursassiala, numnadamein la Secziun "Muraun" a Mustér, ed era en las vischnauncas da Sutsassiala ein seformadas novas secziuns. En mintga cass existeva la Secziun Greina cuort suenter la secunda uiara mundiala mo pli ord Schlans e Breil. Ils 3 da december 1950 renunzian Schlans e Breil capeivlamein al num "Greina" en favur dils catschadurs da Sumvitg.



Emanuel Deragisch 1882–1968

Gl'onn 1938 han ils catschadurs da Tujetsch e da Mustér organisau ina catscha communabla e quei en duas gruppas, ina el territori dil Bostg e Val Segnas e l'autra en Val Gierm e Cuolm Cavorgia, l'emprema catscha sin tscharvas en Surselva.



Cheu sepresentan sin la fotografia la gruppaa dil Bostg-Val Segnas cun las duas bialas tscharvas, sittadas da Christian Berther.

Davon da seniester: Maissen Stiafen, sen., Mustér, Levy Gion Antoni, Mustér, Huonder Baseli, Mustér, Soliva Christian, Sedrun, Monn Ignazi, Sedrun, Berther Christian, Sedrun, Deragisch Emanuel, Sedrun, Schmed Giochen, Mustér.

Davos da seniester: Werth Sepli, Mustér, Tenner Leonhard, Mustér, Deragisch Josef, Mustér, Maissen Stiafen, jun., Mustér, Giger Baseli, Mustér, Giger Josef, Mustér

Toni Hitz rauenta per exempl da siu emprem di da catscha 1935: "Gl'emprem di ch'jeu sun ius a catscha insumma, vevel jeu buca sittau noda avon. Jeu vevel la buis dil bab e lez veva detg: "Sittar noda ei buca necessari. Cun quella buis gartegias segir. "Jeu sun ius vi da Plaunmiez en e si encunter Nual e cartevel tudi ch'jeu stuessi sittar noda. Si Nual hai jeu lu veramein

tschentau sidretg ina platta morta sin ina distanza adattada. Miu siet ha fatg ir il crap en scalgias ed jeu sun staus leds. Suenter hael jeu era viu camutschs e sittau in tafer buc ellas Alpettas (vart da Nalps) e purtau el naven dils Garvers/Maler dil dies ora entochen sil Tgom e digl uaul giu entochen casa. Il bab ha detg: "Ussa sei finiu cul Toni. Ussa cala el buca dad ir a catscha pli." Da quei temps savevan ins ir dis en e dis ora per la val entuorn senza entupar ni carstgauns ni selvaschinas.

1938 haveva Tujetsch 16 catschadurs. Nov da quels eran commembers dall'uniun "Muraun" da Mustér. L'idea da fundar ina atgna uniu en Tujetsch ei sedada suenter ina catscha communabla cun quels da Mustér. En "Introducziun" tier gl'emprem cudisch da protocols retegn Felici Monn quei schabettg en suandonta maniera:



Catschadurs Christian Berther e Gion Battesta Giger ed in giuven aspectatur dallas duas tscharvas da 12 resp. 14, 1940

“Ei era ils 26 da settember 1942, e giud clutger baselgia aud’ins ual a dend las sis, che nus catschadurs tujetschins cun aunc enzaconts da Mustér marschein da Drun giuado encunter Pardatsch. Ei era il di dalla catscha communabla e vid il firmament s’enzugliavan stgiras neblas ed il vent furiava aschia ch’ins stueva quintar cun in di da dracca. Marschond atras gl’uaul da Cavorgia e traversond silsuenter la Val Gierm e gl’uaul Pazzola, e quei senza resultat, era ei nuota da smarvegliar, pertgei beingleiti suenter l’entschatta da nossa aventura ha la plievgia suandau nus e quei sin tala moda ch’ins era da sum tochen dem buca in fil schetgs. Aschia essan nus sco paupers galiots serabitschai tochen els mises dallas Cavorgias e quei senza sponder saung e nua ch’ei ha giu silsuenter num che la catscha generala seigi alla fin e vegni sligliada. Suenter haver consumau rubas e strubas dil cuntegn dil sacados e targend la pipa da gust per ch’ins vegni buc a freid, havein priu commiau dals camerats da Mustér per serender a casa. Arrivai a Cavorgia ha ei, sco ei havess stuiu esser, illuminau nus, sche gia sposai dil strapaz e dalla dracca, essan unanimamein stai dil mein da far aunc ina attacca giu ils Unfiarns, mo quella ga buca per l’uniun mobein per nus....”



Theofil Loretz, Luis Monn, Ignazi Monn e Florentin Soliva, 1973

Il participont Ignazi Monn paleisa semegliontamein dall'aventura en sias notizias da catscha: "Ils 26 stau plitost ina catscha da pauc, Catscha generala cun ils da Mustér, stau in di da gronda dracca. Fatg negina catscha. Mo vegnend a casa en dallas Cavorgias havein nus da Tujetsch tuttina aunc vuliu far in davos sforz, schegie che nus eran tut giuts. Havein aunc catschau en las Caschatschas e leventau in tschierv, il qual il Toni Hitz da Rueras ha sittau si els praus oragiusut Cavorgia. Schegie che la catscha communabla era vegnida sligida, levan ils da Mustér era art e part da quella (tscharva). Mo nus havein fatg la catscha persuls ed aschia ei il da dudisch staus nos."

2. Ils emprems onns dall'uniuon

2.1 La fundaziun

La fundaziun per propi ha giu liug ils 19 da mars 1943. Quei di ein ils catschadurs: *Manuel Deragisch, Christian Berther-Rhyner, Felici Monn, Toni Hitz, Christian Soliva, Ignazi Monn, Placi Hendry, Alfred Decurtins e Luis Monn* seradunai el hotel dalla Cruna per fundar in'uniuon da catschadurs tuatschina, alla quala els dattan il num "Badus".



Manuel Deragisch, Felici Monn, Toni Hitz, Luis Monn, Luis Schmid, Ignazi Monn e Christian Soliva, 1943

Christian Berther
emprem president
de la Federaziun
da caccia e pesca
delle Selvaschias



Christian Berther,
emprem president

Sco president vegn Christian Berther-Rhyner elegius, sco actuar Felici Monn e sco cassier Toni Hitz. Ils organs dall'unioen ein vegni incaricai dad elaborar statutas, las qualas dueigien vegnir prelegidas all'emprema radunonza. Las statutas ein vegnidas approbadas ils 23 da matg 1943 e circumscrivan en gl'artechel 4 igl intent dall'unioen: "L'unioen da catschadurs "Badus" ha gl'intent da sustener ses commembers, da promover l'unitad denter quels, da sustener e batter per il sistem da patenta ed il schurmetg dallas selvaschians."



Treis leghers camerats
(Toni Hitz, Felici Monn
ed Ignazi Monn) armai
da sum tochen dem...

2.2 Poesia: Uniun da catschadurs “Badus”

Per ina sera hilarica haveva il camerat Nazi Monn fatg la sequenta biala poesia:

En nies Tujetsch ei seformau
-Igl onn curontatreis sei stau-
Ein seuni ils curaschus
En l'uniun da catschadurs “Badus”

Il president da noss'uniun
Ei sin la catsch'in ver campiun,
Il Berther Christian lez eis ei:
Adatg vus tscharvas sur Bugnei.

Il senior ei nies Manuel
Mo sittar san paucs sco el.
Roschs camutschs e muntanialas
Ha tuccau cun sias ballas.


In eis ei in fetg fetg fin,
quei ei bein il Felici pin.
Tscharvas siett'el mintg'onn treis
e patarla perfin culs tais.

Placi Hendry il pli pign
mo fetg habels cul latin:
El ha gie adina cletg,
ch'el sei sil Tgom, ni sin il Vretg.

Monn Aluis, il da Surrein
ha bugen cu gl'ei serein.
Lu va'l ault sisum la pezza,
als camutschs la vet'el stezza.

In fetg ner vein denter nus,
quei ei gie igl Alfred barbus.
Schi fetg ha'l mai aunc sevilau
sco il settember da far schuldau.

Il Toni Hitz da Rueras
El ei savens si Pulaneras.
Far star camutschs e muntanialas
e peglia fiergnas cun las fallas.



...e cuort sissu cun la preda, 1949



Placi Hendry, 1980

Il Christian, nies bien Soliva,
Il pli bugen stat en l'umbriva.
Ha sittau bein enqual ratun
Er in tschierv si sur Sedrun

En a Selva sei aunc in
il pli gries da finadin.
Quei ei nies habel Gion Battesta,
che sieta bia atras la testa.

Giu a Rapperswil perfin
havein nus in che sa latin
In catschadur da buna luna
Quei ei il Lucas della "Cruna"

Per catschatuts vegn in lumpazi,
Quei ei il pauper stroli Nazi,
Per uolps ed auter vègl'el bia,
Mo va per regla vits a cà.

Ussa hai jeu bein vus tuts numnau
E vi a tuts ver giavischau:
In vivat, crescat, floreat,
Schi ditg sco nies "Badus" leu stat!



Ignazi Monn e Testa Soliva,
1962

Herrn *Hans Fink*
Al signor
 von *Winkelhaid* geb. *1944*
 da
 wohnhaft in *Eichwilen*
 dimorante a

Besondere Merkmale
Connotati particolari

Nº 2328

wird die Bewilligung zur Ausübung der Hochjagd gemäß den eidgenössischen und kantonalen Vorschriften über den Jagdbetrieb erteilt.

è accordata la licenza per la caccia alta in base alle prescrizioni federali e cantonali sull'esercizio della caccia.

Sinnwald, den 6 September 1945

Unterschrift des Jägers:
Firma del cacciatore:

332.900 - VIII. 45

Gebühren-Rechnung		Gebühren-Quittung				
Hochjagdpatent	60	Für den Bezirk Plessur ist nur die maschinelle Quittung gültig!				
Caccia alta	5	Datum	Beleg Nr.	Buchungs-Nr.	Konto	Betrag
Versicherung	50	<i>2. IX. 45</i>				
Aussicherung						
Ausstellungsgebühr	1					
Tassa d'emissione						
Drucksachen						
Stampati						
Total	66					
		<i>(Signature)</i>				
		POLIZEIKOMMISSIONAT BEZIRK VORDERRHEIN				

Nº 18155	
Hochjagd-Patent	
Licenza di caccia alta	
Fruherer Aufenthalt in Graubünden Dimora precedente nel Grigioni	Kategorie <i>A A</i>
Für das Jahr per l'anno	<i>1945</i>

Name, Vorname und Wohnort/Cognome, nome e domicilio

Hans Fink, Eichwilen

Gebühren-Rechnung/Conto delle tasse		Fr.
Hochjagd-Patent/Caccia alta		<i>60.-</i>
Ausstellungsgebühr/Tassa di rilascio		<i>15.-</i>
Drucksachen/Stampati		<i>5.-</i>
Abschussliste Statistica della selvaggina uccisa	Nr.	
Ausserordentliche Bewilligung/Permesso speciale		
Datum der Ausstellung/Data di rilascio	Total	<i>(623.-)</i>

Aschia vesev'ina patenta da catscha
 aulta ora, dus onns suenter la fundaziun
 dall'uniuon da catschadurs Badus.....

....ed oz

Diese Patent ist nur in Verbindung mit dem Jagdpatentbuchlein gültig. La presente licenza è valida solo insieme al libretto per le licenze di caccia.		Für die Ausgabestelle/Ufficio di rilascio
		<i>(Signature)</i>
6500.900 V. 93 (Nr. 12 801-18 900)		

Ch'ils postulats da catscha eran da contonscher sulettamein en collaboraziun cun autres organisaziuns han ils Tuatschins viu en immediat. Els entran perquei gia 1943 en l'uniun cantunala, la quala era vegnida fundada exactamein 30 onns pli baul, numnadamein 1913.

Ella radunonza generala dils 13 da schaner 1945 presenta il cassier sequent quen:
e 48 onns pli tard

Bilanza per 1943/44	Bilanza per 1991/1992
Entradas frs. 205.10	Entradas frs. 18'941.—
Expensas frs. 71.30	Expensas frs. 17'662.75
Total en cassa 1944/45 frs. 133.80	Facultad da circulaziun: frs. 15'453.25 Facultad cassa da tgira: frs. 6'812.75

3. Settanoda e stans da sittar

Dil temps dalla fundaziun dall'uniun er'eui uiara e scart empau dil tut. Aschia vegn ei detg ella radunonza dils 2 d'uost 1943: "Arisguard la munizion, la quala ei oz buca da survegnir sco avon l'uiara, vegn supplicau da vuler segidar, sch'in ni l'auter vegness en difficultads."

Gia ils 2 da settember 1945 ha l'uniun "Badus" organisau igl emprem settanoda. Ei era in di da fina bialaura ed ils bials premis fagevan tut queida.

Il sittar noda ha da cheu naven adina puspei occupau l'uniun "Badus" ed el program dils 31 da matg 1953 vegn ei giavischau da menar atras in settanoda e quei per tuts interessents.

Entochen ils anno 1960 haveva l'uniun negin stan da sittar e tuttina fagevan ils catschadurs emprovas per esser preparai sil seracass mintgamai ils 9 da settember. Aschia mavan ils da Sedrun per exempl si Salins e sittavan sul Run vi. Tgi sittava e tgi veva da mussar ils resultats.

Ella radunonza digl emprem da matg 1960 vegn discussiunau davart in plaz per in stan da sittar. L'uniun elegia ina cumissiun. Gia ils 14 d'uost 1960 sa il president Felici Monn orientar ils catschadurs che la lescha cantunala pretendi che la vischnaunca metti a disposiziun in plaz da sittar. La cumissiun seigi seconferida cun la vischnaunca, la quala mondi d'accord da metter a disposiziun in plaz adattau giul Run. Il plaz sil "Prau dils paupers"

seigi previus sco rampa da sittar. E da sittar seigi ei naven dalla rampa si viers la plauncael "Prau dalla pleiv". Cun quella proposta van ins generalmein d'accord, ed ei vegn concludiu da gia far quei onn il pli necessari vid il plaz offeriu.



Ina sentupada da catschadurs 1991

Da quei mument naven ha l'idea da vegnir tier in ver "stan da sittar" adina puspei occupau l'uniuon da catschadurs "Badus". Cu il plaz ei ina ga staus fixaus definitivamein, eis ei vegniu luvrau stediamein. Il plan per ereger il stan da sittar ei vegnius furnius d'ina fatschenta dalla bassa. Sin fundament da quei plan ha Clemens Monn fatg in cundrez da trer si las schibas. Ina firma ha dau in trax per schar scavar ora il stan da schibas. Entochen la primavera digl onn 1966 eis ei vegniu luvrau vid il stan da sittar ed il plaz da schibas en tut 563 uras e mesa. Sin ils 11 d'uost eis ei vegniu clamaou en ina radunonza pervia dil tir da catscha che dueva ver liug ils 20 e 21 d'uost. Las lavurs vid ils indrezs da sittar eran aunc buca a fin. Ins ei denton tuttina vegnius da ventscher las lavurs e da menar atras il tir. Il president August Bass menziunescha tenor protocol dils 21 da matg 1967: Schegie ch'il tir seigi reüssius fetg pulit, stoppien ins egl avegnir aunc esser pli activs ed haver bien uorden e buna controlla cun la muniziun ed auter.

En la medema radunonza vegn concludiu da dar caschun a novs catschadurs da sittar avon che far igl examen e quei aschi spert sco pusseivel. Ei seigi denton aunc da s'interessar tier l'assicuranza, co ils tiradurs novs e l'uniu seigien segirai en cass d'accidents.

Sco ei sedat dil protocol dils 28 d'uost 1971, cumpra l'uniu "Badus" la remisa dalla vischnaunca sil plaz dil Drun e quei per il prezi da frs. 1850.-. Medemamein conceda la vischnaunca il sulom giul Run per tschentar si ella, quei denton mo sco terren occupau. Ella radunonza dils 23 d'avrel 1972 vegnan Flurin Berther e Gion Aluis Hendry elegi sco schefs da construcziun per il niev stan da sittar. Per il credit necessari dat la radunonza tutta cumpetenza alla suprastonza cun ils dus organisaturs. Gia alla radunonza generala dils 15 d'avrel 1973 sa il president admetter in grond engraziament ad in e scadin che ha luvrau vid il stan da sittar che ha dau bia lavur ed ei aunc buca finius. All'entschatta dil program da lavur per igl onn 1974 stat la devisa: "Stan da sittar, tenor basegns luvrar vidlunder". Ella radunonza dils 7 da zercladur 1975 vegn giavischau da rugalar il tett, da quintar ensemens las uras da mintgin e da serrar giu quen sin la sentupada annuala da 1976. Denton pér ella radunonza generala dils 28 d'avrel 1978 eis ei reussiu da dar giu quen definitiv davart il stan da sittar. Quel ha custau frs. 18'766.50. Ei resta in deivet da frs. 6'000.- sin quei object.

Ella radunonza dils 9 d'avrel 1976 vegn ei decidiu da cumprar il stan da sittar "lieur", in indrez da Giachen Antoni Berther, Sep Lurenz Berther e Christian Monn. Quei indrez vesa ora sco suonda: Il maletg d'ina lieur da metal dubla vegneva vulvida mintgamei a maun da dus catschadurs, in dretg ed in seniester. Quels controllavan e mussavan il siet. El tgierp dalla platta da metal davon era ina schiba baghegiada en, ina da cartun da 10 sin 12 cm. En quei cartun stuevan treis ballins sesanflar per esser valeivels. Il sistem era fetg malsegirs pervia dils ballins. E tut che senuspeva da luvrar vid quei menaschi.


Sut il presidi d'Emanuel Berther vegn engaschau ca. 8 onns pli tard ina cumissiun da studi per ereger in stan da lieur automatic: sistem tenor in stan da lieur el cantun Turitg ch'ins ha saviu copiar entras intermediaziun da sgr. H. Auer. La cumissiun ha studegiau il project ed anflau el per acceptabels ed ha encuretg in plaz per ereger quei stan da sittar. Ils cuosts approximativs eran calculai sin frs. 15'000.- per stan e plaz da schibas (lieur).

Ils 13 d'avrel 1984 vegn il project presentaus alla radunonza generala ed el vegn approbaus cun l'incarica d'ereger el giul Run (dadens la punt Baselgia) sur il Rein vi. Il stan da sittar da vart senistra e quel dalla lieur da vart dretga dil Rein.

La part tecnica ei concepida aschia ch'il catschadur el stan da sittar dat in camond cun smaccar in nuv ed igl indrez vegn en moviment. In motor tila il carr cun si la lieur che stat l'entschatta el zuppau e vegn uss veseivla e resta quei sin ina lunghezia da 5 m. La spertadad ei 1,8 m per secunda. Il maletg dalla lieur exista ord treis parts, aschia ch'ei dat ina buna selecziun denter ils tiradurs. Part davon treis, part amiez dus e part davos in punct. In siet concentraru cun ballins damogna tuttas treis parts en ina ga e dumbra pia sis puncts. In meins concentraru forsa mo ina part. Las parts curdadas vegnan puspei tschentadas si automaticamein el zuppau. E lu entscheiva la procedura danovamein.

La collaudaziun dil stan da sittar lieur ha giu liug ils 14 d'uost 1984. Quei sistem ei vegnius reglementaus e lubius dall'uniuon da catschadurs grischuna e vegn producius e vendius aunc oz d'Emanuel Berther a societads da catschadurs en Svizra.

Cun quei ch'il stan da lieurs era en funcziun han ins menau atras in tir da catscha uffizial 1985. Ils onns 1978/81 han ins medemamein arranschau tirs da catscha cun mintgamai stupent success. Gia ils onns 1965 e vinavon han ins organisau settanodas regiunals, per part cun caliber pign, sco quei che l'uniuon prepara mintgonn in semegliont.





4. Partenent la tgira

4.1 Asils da selvaschinas

In quitau per las selvaschinas el vast senn dil plaid ei vegnius praticaus gia avon che l'uniun seformeschi. Ils asils vevan gl'intent da schurmegiar ils animals selvadis en areals pli gronds e da cheutras dar ad els la schanza da seregiuvinar e s'enfirmir. Aschia ha la gruppa da catschadurs da Tujetsch, sustenida dil sulvigilader da catscha e dalla suprastonza communalia fatg la damonda per in asil el territori entuorn il Tgom ils 26 da mars 1934 tier il departament cantonal da giustia e polizia. Ils cunfins previ ein veseivels sin la carta fotocopiada

Igl emprem asil (1939 -1945)

ed ils asils momentans (1991-)



- asils generals
- asils d'utschleglia da catscha bassa
- asil d'utschleglia dall'aua

Ins ha scaffiu all'entschatta mintgamai mo in asil e quel era dapertut dil medem gener, pia mo asils generals. Ils davos onns han ins entschiet a specificar ils asils. Els ein vegni pli pigns, denton han ins augmentau il diember.

L'enumeraziun dils asils en Tujetsch dat suandont maletg:

1339 - 1945	asil general	Tgom
1946 - 1965	asil general	Cuolm da Vi - Val Strem
1966 - 1970	asil general	Cuolm da Vi - Val Strem
1971 - 1975	asil general	Val Strem
1976 - 1980	asil general	Caschlè
1981 - 1985	asil general	Caschlè (lubiu da maner en tegia da Strem)
	asil general	Tuma Nalps
1986 - 1991	asil general	Asil Caschlè (Senza l'Ondadusa)
	asil general	Tuma Nalps
	asil muntanialas	Calmut
1992 - 1997	asil general	Val Val (Vart senistra)
	asil general	Val Milà (Vart dretga)
	asil general	Val Strem (Vart senistra)
	asil general	Val Nalps (Seniester dil lag e plindano)
	asil d'utschleglia	Pazzola - Cavradi -costa senistra dil Tgom
	asil d'utschleglia	Riva dil Rein denter la punt dil Run tochen la punt da Milà enta Rueras

La specificaziun dils asils sa engrondir la resca d'in surpassament sco la suandonta anecdota muossa:

EM ei ius in di a catscha en Val-Val cun siu camerat Fl. Sin la spunda dil Calmut pasculava in hazer bi cavriel, ch'Em ha prest giu el visier. El ha sittau, schizun duas gadas e buca tuc. Il cavriel ei scappaus giu tras l'aua e vegnius a mauns da siu camerat. Em saveva buca capir da ver falliu quei cavriel, el, in tiradur da num. En siu panzieri vesa el buca dalunsch sut el ina hazra muntaniala che stat sco ina schiba. Em, aunc miez trubistgaus, di a sesez: „Sieta salmains quella“. El gartegia e pren la muntaniala. Siu camerat da l'autra vart da l'aua grescha e fa smanis ed Em sa buca pertgei. El va giuviars cun sia preda e pér sut las caglias vegn ei endamen ad el ch'il Calmut ei asil da muntanialas. El ses'immediat giu, cuviera la preda, fa ina „spieglada“ e pren ord il sacados in vinars cun l'intenziun da catschar lien la muntaniala. Suenter cuora el giu tier siu camerat da l'autra vart dall'aua e dat leu in siet per far la fenta da ver sittau ordeifer gl'asil.

Ils asils han valeta da tgira e catscha enina sco quei seresulta dil diember dals tiers sittai mintgamai gl'onn ch'ins ah aviert in asil. Ch'ins sieta numerus animals ei d'attribuir era allas prescripziuns da catscha ed al fatg ch'adina dapli catschadurs indigens ed jasters emprovan lur cletg en Tujetsch.

Onn	bucs camutsch	cauras camutsch	taurs tscharva	vaccas tscharva	bucs cavreuls	cauras cavreuls	total
1966	1	13	11	3	10	0	38
1971	16	6	8	3	7	0	40
1976	33	18	11	4	8	0	74
1981	20	11	13	5	14	5	68
1986	40	20	30	12	6	0	108
1990	22	77	16	10	22	8	155
1991	46	22	19	11	11	16	125



Clemens Monn, Theofil Loretz, Gion Aluis Hendry e Leci Brugger cun preda,
1970


Bunas raccoltas ordeifer ils asils:



1982 sietan Marius Beer, Ignazi Monn-Tuor, Luis Monn, Gabriel Monn e Felici Monn in taur da sedisch silla Val Bugnei: Quei ei stau entochen oz la pli gronda tscharva.



Norbert Vinzens ha terrau
in taur da quitordisch sur
Sedrun 1981.



La „dunschala“ da Val Giuv e siu "fegl". Il losch possessur ei Vendelin Giossi

La suandonta historia, nudada si da Norbert Vinzens e responsada da Hans Monn, descriva in **di da catscha cun surpresas** en in anterius asil ch'ei vegnius aviarts 1992:

Il Placi ha giu il cletg da sittar beinmarvegl in buc cavriel, il Vic dad anflar la caura cavriel cun agid dil tgaun dil Vendelin. Il Reto yeva blessau in'uolp. Demai ch'il tgaun era sil plaz han els encuretg ella, mo senza success. In proverbi da catscha di: „sieta mai sin uolps la damaun, cass cuntrari has ti gl'entir di negin cletg“. Da menziunar eisi aunc ch'igl amitg da Reto, igl Ervin Monn, era quei di sin viseta per gidar a far transports. Vulend el controllar la caura dil Vic, ha quei nuota plaschiu al tgaun e quel, buca maufers, dat ina miersa a siu nas ch'ins vesa aunc oz quella noda.

Entuorn miezdi ei la grappa sedividida per far in'attacca pli gronda. Il Placi ed il Vic ein i da Milar en, il Sep Lurenz ei ius cun siu buob Marc si Culmatsch, il Reto ed igl Ervin ein sepustai sil Crest Liez.

Da mesa las duas vesa Reto in taur che schai ellas caglias dalla Val Milar si encunter Caschlè. Immediat cuoran els dalla Val Milar en nua ch'els entaupan il David dil Faustin, ch' era sin via da visitar ina gruppda Caschlè. Il Reto ed igl Ervin levan observar il taur. Quei stoda David denton mirava traso tgei ch'els fagevan ed els levan buca setradir.

Els van dallas plauncas dil Culmatsch si per saver controllar endretg il taur. Leu entaupan els il Vic ed il Placi. Il perspectiv grond vegn tschentaus si. Il taur era in furtget lubiu-mo tgei vesan els buca lunsch naven dil taurechel-in taurun. Igl ei in taur da diesch cun cornuna senza cruna, pia lubius.

Il Vic va spertamein sisum il trutg da Caschlè sin posta. Il Placi sin "scantschala" ed il Reto fa l'attacca da surengiu. Tgei patratgs ch'ein i ad el tras il tgau mond si Caschlè sa negin. El veva aunc mai sittau in taur. El fa in patg: "Sch'jeu sietel in taur, emporta nuota tgeinin, dun jeu frs 50.- a s.Antoni".

Arrivaus si Caschlè, va il Reto en ruschnas ed en venter dallas caglias giuado. El liug destinau chuchegia el sur in crap ora e vesa il taur pign sin ina distanza da ca. 20 m. El mira sil Reto, che fa buca igl asen e sieta. Il taur dat in segl e serocla. Immediat seglia Reto sin in crap, dat in gibel dal plascher ed en aquella cuora il taur grond ca. 5 m sut el ora e svanescha en las caglias viers il Placi. „Ti mo va“, tratga il Reto, „cheuo ei aunc in“. Cuort sissu in fraccass, zatgei crappa rocla e lu regia silenzi sco en baselgia.

Tuttenina entscheiv'il Placi a clamar. Il bien Reto capescha nuot e va encunter ad el. Quel steva cun la buis en mira, pinaus da dar in siet. Dalla rabia havev'el piars la capiala. El veva viu il taur grond giusut ellas caglias. Sinquei fa il Reto: "Ju a sittau sel taur pin e nueta sel gron". Els secunvegnan da sussentar il Vic per far ina nova catschada. Cheu arriva igl Ervin da sutensi ed il Placi fa caussas. El dueigi star leugiu e buca disturbar. Ervin vegneva encunter e leva gratular a Reto: "Per cletg has ti il grond. Jeu hai viu co el ei ruclaus, tgei patagner"! Reto di: "Jeu hai sittau sil taur pign ed hai viu co el ei seruclaus: Il grond stuein nus aunc catschar ora.

En quei interval vegn il Vic viers Reto. Gia sin in kilometer aud'ins el a sevilond, pertgei ch'el hagi buca sittau sil grond.

Cheu fa igl Ervin attent sin in tac brin en las caglias. Dall'examinazion seresult'eit ch'in taurun cun termenta corna schischeva ella draussa. Ha quel forsa cruna?

Il Vic pretenda ch'il taur pign seigi ruclaus. Igl Ervin ei segirs ch'il grond ei ruclaus e sittau vev'il Reto segir sil pign. Serendend empau anen vesan els dalunsch il taur pign, q.v.dir sia corna che vargava ord las striaunas. Il mein era ch'ei seigi in lontschet buca lubiu.

Il pauper Reto tratga per sesez: Leuen in „Spiesser“ memia liung e tscheuo in da cruna. Quei vegn ina "tgera pustrarcca"!

Il Reto ha nuota schau stermentar ed ei revius si sper il taur. Tgei glimari, in bellezia taur da diesch schischeva cheu stagn ventschius e senza cruna. El dat in gibel!

En quei mument grescha il Vic che tschei seigi in furtget, in flot tauret. Ussa suondan gibels e grius che perfin il Sep Lurenz giu ella Val Milar ei sedestadous.

Il Reto haveva tuc il taur pign ella scaffa e sin siu emprem gibel ei il taur grond da 155 kg siglius da tala maniera ch'el ei seruclaus e sesturnius.



Il Sep Lurenz, il Placi, il Vic ed il Reto cun la preda di.

4.2 La tgira per propi


Gia ellas empremas statutas ei il patratg dalla tgira vegnius francaus e quella ha adina puspei occupau ils catschadurs tuatschins.

Ella radunonza dils 2 da zercladur 1962 leventa "igl ereger pursepens" per perver ils animals selvadis igl unviern empau discussiuns. Felici Monn e guardiacatscha Luis Schmid dilucideschan avantatgs e disavantatgs. Unanimamein ein ils commembers per interprender enzatgei en caussa. Per organisar endretg quella lavur vegnan Felici Monn, Luis Schmid e Christian Berther, incumbensai.



Stanis Monn e Gaudenz Flury en funcziun da tgira, 1986

Oz pervesan ils commembers dall'uniuon da catschadurs "Badus" sin in'autra moda. Sin las suandontas fotografias vesein nus l'erecziun d'ina meidia. Sin gl'emprem maletg san ins constatar che las selvaschinas san magliar da sutensi dalla meidia che vegn tschentada en in liug adattau e ruasseivel. Quei sistem ha il president dils cau-tgira Ignazi Schmid "inventau". Cun agid dils candidats, dil guardiacatscha Gabriel Monn e d'enzaconts catschadurs ha nies cau-tgira, Marius Beer, tschentau si gl'entir cundrez.




Erecziun d'ina meidia



Ils Tuatschins ein stai pioniers en caussa tgira, pertgei ch'in uorden cantunal ei sefatgs per 1974. E gia quei onn - a caschun dalla radunonza generala dils 24 da mars - han ils commembers elegiu per l'emprema ga in cau-tgira, numnadamein Flurin Berther. Quei fatg ei vegnius retenius el protocol cun tenta cotschna. Da quei mument naven eis ei vegniu menau in quen separau per la tgira. In novum che stat en connex cun la tgira ei sedaus en la radunonza dils 16 da fevrier 1977: Ins ha decidiu da far in'exposizion da trofeas. Dall'emprema sera da trofeas relata il protocol denter auter:

“Signur president, Norbert Vinzens, arva la sera, fagend a tuts in cordial beinvegni, specialmein a dunnas e muronzas. La sala ei decorada stupent suenter gust da catschadurs. En in cantun las trofeas. Mintgin ha giu caschun d'admirar quella massa cornamenta da tscharvas, camutschs e cavreuls. Deplorablamein han buca tuts dau giu ellas per la premiaziun. Jeu havess bugen dau giu, mo signur Levy era ius cun tut...”




Trofeas, 1980



1992 sieta Gaudenz Flury quei bellezia buc



In buc cun treis cornas ei buca normal, mo interessant. 1993 ha Flurin Berther terrau quei buc sil Tgom.



1985 sieta Marcus Schmid sur Tschamut in buc cavriel da diesch.

4.3 Ils capricorns vegnan

1964 ei la damonda d'introducir capricorns en Tujetsch setschentada. Il Cantun era cuntets da dar ina colonia da 10-12 tocs, priu che la vischnaunca detti siu consentiment. L'uniu "Badus" sperava da prest saver beneventar en Tujetsch la biala selvaschina. Quella ei vegnida 1966 suenter che la vischnaunca veva detg gie. Ella ei secpescha stada schurmegiada cumpletamein.

Ils capricorns ein sesviluppai fetg bein els differents loghens dil Cantun nua ch'els ein vegni mess ora enteifer ils davos decennis, aschia ch'il Cantun ha saviu patertgar da far ina selecziun cun catschas da tgira.



La colonisazion da capricorns en Tujetsch, 1966. Andrea Rauch, Pontresina, Luis Schmid, Zarcuns, Alfred Decurtins, Sedrun, Gion Aluis Beer, Zarcuns

Davart la catscha sin capricorns relata in'annexa tier il protocol dils 27 d'uost 1977: "Suenter in pèr tschentaners han ins fatg ina catscha da capricorns. Mintgin ch'era ius diesch onns a catscha astgava s'annunziar. En Tujetsch havein nus giu quater da noss'inuin. Quels ein: Toni Hitz, Felici Monn, Flurin Monn e Clemens Monn. Suenter in'orientaziun ha mintgin astgau sittar in da quels animals tenor il cletg da vegnir tratgs ord la capiala e pagar l'indemnisazion. Ils vegls e rutinai catschadurs han giu cletg. Mintgin ei vegnius tier siu capricorn."



Felici Monn cun siu buc da 13 onns



Clemens Monn cun la caura
da 14 onns



Emanuel Berther cun la caura e Flurin Berther cun il buc, els ein ils emprems tuatschins ch'han fatg catscha sin capricorns en nossa val.





Vendelin Giossi e Placi Berther cun tgaun e preda, 1992

In patratg da tgira ch'ei vegnius promovius expressivamein dapi 1960 el Grischun ei quel da segidar en cass da basegns cun tgauns da saung. En Tujetsch ha Leci Brugger, igl emprem possessor d'in tgaun da saung adina puspei intimau ils catschadurs da far diever dil tgaun. Aschia ha el per exempl orientau ils 20 d'uost 1982 ils camerats da quellas varts. Mintga catschadur hagi ina gronda responsabludad enviers animals blessai e dueigi encurir tals cun tgaun.

En in tal cass san ins sevolver oz tier Vendelin Giossi che ha surpriu quella missiun. Era nies guardiacatscha Gabriel Monn posseda in tal tgaun. Omisdus segidan bugen sch'els vegnan clamai, quei che capeta oz beinduras.

5. Da catschas communablas

Ins po dir ch'igl ei vegniu menau atras quasi mintg'onn ina catscha communabla ch'ei adina stada d'interess per la cameradaria. Ei vegn fatg gruppas da treis ni da quater cun trer la sort.

5.1 Ils 19 da settember 1966 (tenor rapport da Monn Ignazi)

“.... Nus persequitein el (Felici Monn) cun nos perspectivs e pilvermo vonzeivi rebatta in siet e nus vesein ina tscharva a ruclond ella draussa. El veva era viu nus e dau segns da tarmetter in camerat per gidar. Nus tarmettein il camerat Toni Hitz per schar gidar a val cun la selvaschina. Strusch era Toni naven che dus catschadurs sepresentan sil grep da caltschina (Pardatsch da vaccas). In ei Flurin Monn e l'auter in jester. Flurin ha prest engartau nus e fa spiegaments e muossa da vegnir. Nus essan ladinamein serendi giu sil grep da caltschina per mirar tgei ch'ei detti da niev. Arrivai dat Flurin in detagliau sclariment sur dil passau. El ha giu il cletg da sittar ina tscharva ed ha schubergiau e preparau ella pil transport a casa. Cun quei

ch'el veva buca giu in daguot la damaun, haveva el ina detga fom ed ussa suenter quella bravura va el a Cavorgia tier l'onda Barla ed igl aug Adolf a gentar. Turnaus anavos tier sia selvaschina eran treis catschadurs Deragisch da Mustér leu e pretendevan ch'els hagien blessau quei tier e vegni suenter il saung entochen sin quei plaz nua che Flurin ha dau il siet mortal. Ils Deragischs pretendan ch'il tschierv seigi ses, mo camerat Flurin ei buca fetg cuntents e perquei eis el vegnius tier nus per sediscuorer. Nus essan lu vegni da pacificar las duas parts. Flurin survegn ina bunamana per il siet e l'uniu frs. 50.-.

Duront che quella dertgira ha giu liug han camerat Felici e Toni viu a mond in ferment tschierv ca 100 m sut nus en atras la val, mo nus eran memia fatschentai e vein viu ni peil ni pelegn. Quei tier haveva Toni Monn leventau egl uaul Cavorgia, mo deplorablamein falliu el.



Pius Deflorin, Gion Aluis Hendry, Emanuel Berther,
Luis Monn, Leci Brugger, Placi Levy, 1971



Emanuel Berther, Stanis
Monn, Vendelin Giossi,
Ignazi Schmid, Marius
Beer, Hans Decurtins e
Hans Monn, 1984

Ei va buca ditg ch'ins auda a sittar sil Tscheer. Placi Hendry e Testa Soliva han a mauns tscharvas. Cun plascher udin nus ch'il Placi hagi fatg star ina. Nus essan lu serendi el liug e gidau a Pardatsch cun la selvaschina. En buca ditg era nies president August leu cun igl auto e nus vein saviu cargar la tscharva ed era il Felici e Toni eran gia semtgai sper via cun la preda, aschia ha ei dau ina biala carga da 2 tscharvas. Ei fuss aunc stau meglier sche camerat Flurin havess buca stuiu schar ir ils da Mustér cun sia selvaschina.”

5.2 Catscha generala 1987 (tenor rapport da Giossi Vendelin)

“Era uonn han ins fatg catscha communabla e quei ils 19 da settember. Sco darar han ins gartegiau in di senza in tac nebla. Per far ina catscha sin tscharvas eis ei denton empau da schetg. Per mei ei quei igl emprem onn da catscha che hiel saviu bandunar la damaun marvegl (il suttetg) sulettamein en camischa, gie schizun cun viult enasi las mongias. Gl'entir di han ins dau breigia da puder tier ina preda. Il cauld suleegl ha denton fatg star ils animals dil di ell'umbriva, pia el zuppau. Era ils catschadurs ein stai cuntents d'haver mintgaton in umbriva sur il tgau. Vagnend tutz catschadurs la sera ensemes a Dieni el hotel Cresta, ha mintgin stuiu seperschuader, che negin haveva giu cletg.”



Catscha generala dall'Uniun "Badus", 1991

5.3 Catscha bassa e catscha da laghetg

Suenter la catsch'aulta cun sias discussiuns e sensaziuns serendan entgins catschadurs da Tujetsch alla catscha bassa. Els gaudan la tgeuadad digl atun.



Treis cumpogns da catscha bassa cun preda,
Marius Beer, Norbert
Vinzens e Flurin Monn.



Norbert Vinzens cun la preda d'in unviern, 1992

5.4 Raschieni d'in catschadur sils onns

Toni Hitz rauenta ils 6 d'october 1990 ch'el seigi staus 1989 a catscha cun la patenta schenghegiada dil Cantun, pia per igl anniversari da 50 onns catschadur. El eri si Mulinatsch e mavi plitost suenter muntanialas. In di seigi el ius da Liez ora cun l'idea d'ir silsuenter a casa. Ella val Fontaunas seigi el daus sin in cavriel, ch'eri sezuppaus pulitamein ellas caglias ed el hagi perquei stuiu mirar e mirar. "Ju ha lu viu tgi era in bi buc e vai sittau." Stanis Monn era giu Malamusa ed ei vegnius si per segidar cun il transport a tgèsa.

In cass semegliont hagi el passentau ils 84 ni 85 era si Liez a Fontaunas. El eri s'entuppaus culs camerats da Malamusa: Sep Lurenz Berther, Christian Monn e Vic Pally, epi seigien aunc Emanuel Berther e Flurin Berther vegni neutier.

"Quei cavriel ella plontaziun da Liez sto no oz, schevan tutz." El seigi ius sin siu post a Fontaunas. Vonzeivi vesì el ellas caglias il cavriel. El prendi en mira, sietti e gartegi. En quei mument segli in camutsch pli envi ord las caglias. El hagi spert examinau e sittau ed il camutsch crodi medemamein. Sin quels siets s'approximeschi gl'emprem il Manuel e lu ils auters camerats. Silla damonda "has sittau enzatgei," rispondi el "gie", ed ils camerats hagien prest giu il cavriel e fatg la lavour necessaria. Lu hagi el detg a Sep Lurenz ch'ei seigi aunc in camutsch pli envi e tutz hagien cartiu, ch'ei seigi ina sgnocca. Il Sep Lurenz hagi cattau il camutsch e tutz seigien segidai, aschi ch'el sez hagi giu neginas breigias ed el hagi giu plascher dils buns camerats visavi in catschadur pli vegl. El sappi dir ch'ils camerats da catscha seigien adina segidai cun el.



Stanis Monn, Nazi Schmid, Teofrid Giossi e Vendelin Giossi, 1989

5.5 Lein cuntinuar cun duas anecdotas da muntanialas

Il Christian Monn ed il Sep Lurenz havevan controllau l'entira damaun la Pulanera, mo senza haver engartau enzatgei da vaglia. Aschia caminan els da cumionza encunter il Crest Liez. Traversond il dutg dalla Pulanera vesa Christian si Fontaunas ina muntaniala. Cun quei ch'ella fageva ina pulita pareta semetta el giu, laghegia e ...plumf. Gia rocla ella sc'in cani dalla spunda giuado. Omisdus serendan viers la muntaniala ch'era sefermada en in fiep. Vesend che la muntaniala veva aunc empau la ragogna, spetgan els in'uriala avon che prender ora il dadens. Christian pren neunavon sia carta per scriver en la preda.

Cheu cloma Sep Lurenz: „Mira tscho la samuanta!“, e sco sch'ella vess viu il gianter reiva ella dalla spunda si e scappa da ruosn'en. Ils dus catschadurs emprovan da pigliar ella, mo tutta breigia ei vana. Aschia ei la muntaniala vegnid'ella carta, mo buc'ella cazzetta.



In bi di mava igl Alfred Monn da Strem en sin camutschs. Visavi la tegia observa el ina muntaniala ch'ei vida pastgar. El fa buca liungas e pren en mira la biala. La stoda sto haver sentiu la puorla, pertgei ch'ella entscheiva a cuorer encunter siu staup, mo igl ei memia tard. Alfred haveva gia stendiu il tgiet ed il siet era gia naven. "Quella hai jeu segirtuccau, pertgei ch'jeu vevel en bein ella", marmugna Alfred traversond l'aua. En buca ditg arriva el al plaz nua che la muntaniala veva dau in zambagl ed era svanida. Mo dalla

„munca“ vesa Alfred ni peil ni pelegn. Mo tgei surpresa? In toc cua muntaniala! Tgi sa sch'enzatgi ha tagliau giu ina cua e piars ella? Ni hai jeu forsa sittau giu alla paupra sia part davos? In onn pli tard, enten turnar a casa, trapla il Felici pign visavi la tegia da Strem ina biala muntaniala che gudeva ils davos radis dil sulegl. Per ella eis ei stau il davos radi insumma, pertgei ch'il Felici ha tuc ella amiez la cavazza. Vulend siu nevs Marius, ch'era cun el a catscha, prender or il dadens, constatesch'el che la muntaniala veva si mo in stumbel enstagl dalla cua. Quei paleisa Marius en si'ustria. Ei vegn lu er'ad ureglia agl Alfred e prest ei l'istoria dalla muntaniala senza cua stada reconstruida.

6. Programs da lavur

6.1 Per 1953

Menar atras in settanoda

Far in'excusiun en vischnaunca ord interess per las selvaschinas

Far 4 sesiuns dall'uniuon ad onn

Far ina sera hilarica evtl. cun film e notg libra

Temps da gronda nevada, tgira dallas selvaschinas.

6.2 Per 1979

Tir intern-dall'uniuon

Far ina messa d'engraziament

Far in viadi ad Arth-Goldau e sil Rigi

Program da tgira

Catscha communabla

Premiaziun da trofeas

Ils 3 da november ha il president Norbert Vinzens organisau ensemens cun sur plevon Giusep Cathomas ina messa d'engraziament per tut il bi gudiu e retschiert sin la catscha vargada. Igl ei stau in novum per l'uniuon, mo segir ina caussa che tuts catschadurs ed era buca catschadurs han schau plascher. Quei muossa la stedia participaziun. La messa ei vegnida celebrada en baselgia da Nossadunna a Zarcuns per il di da sogn Hubert, patrun dils catschadurs cun unfrenda per suffragi dils catschadurs defuncts.....



Messa campestra a Plidutscha, 1989

6.3 Per 1992

Sera da trofeas
Radunonza da delegai
Exercezis da sittar
Tir per in e scadin e tir politic
Tir intern
Catscha generala
Messa da sogn Hubert
Cronica da l'uniuun "Badus"
Niev stan da sittar

Concept da tgira

Far fein

Resgiar ora lenna a Casatschas
Dumbrazion da camutschs igl atun
e da cots selvadis la primavera
Biotops (Val Val, Nalps, Insla)
Sclarir giu partenent zonas da ruaus



Flurin Monn, Toni Monn, "L'Afra" e Sep Lurenz Berther a caschun dalla dumbrazion da camutschs enta Strem

6.4 Predas dall'uniuun "Badus" 1984 1992

Bucs camutsch	19	25
Cauras camutsch	12	54
Taurs tscharva	8	10
Vaccas tscharva	13	20
Cavreuls	7	12/17
Muntanialas	63	114
Uolps	4	38
Bucs capricorn	1	4
Cauras capricorn	2	4

7. Gliestas da commembers

7.1 Suprastonza

Presidents:

Christian Berther	1943-1955
Alfred Decurtins	1955-1959
Felici Monn	1959-1966
August Bass	1966-1974
Gion Aluis Hendry	1974-1978
Norbert Vinzens	1978-1985
Ignazi Schmid	1985-1990
Hans Monn	1990-

Actuars:

Felici Monn	1943-1959
Toni Hitz	1959-1966
Ignazi Monn	1966-1968
Gion Aluis Hendry	1968-1974
Vinzens Pally	1974-1978
Sep Lurenz Berther	1978-1984
Ignazi Schmid	1984-1985
Vendelin Giossi	1985-1990
Hans Decurtins	1990-

Cassiers:

Toni Hitz	1943-1955
Christian Berther	1955-1957
Christian Soliva	1957-1958
Toni Monn	1958-1968
Clemens Monn	1968-1980
Emanuel Berther	1980-1988
Hans Monn	1988-1990
Linus Berther	1990-1992
Marcus Schmid	1992-

Caus tgira:

Berther Flurin	1974-1976
Brugger Leci	1976-1980
Monn Guido	1980-1986
Hendry Christian	1986-1988
Beer Marius	1988-

Administraturs da material

Monn Toni, Sedrun	1957-1958
Monn Felici	1968-1975
Monn Christian	1982-1986
Monn Murezi	1986-1990
Monn Toni, Rueras	1990-

7.2 Commembers d'honur

Berther Christian	1968
Monn Felici	1982
Hitz Toni	1982
Monn Ignazi	1990
Monn Luis	1990
Bass August	1990



Commembers d'honur: Hitz Toni, Monn Felici, Monn Ignazi, Bass August e Monn Luis, 1990

7.3 Commembers

1943

Berther Christian
Berther Lucas
Decurtins Alfred
Deragisch Manuel
Giger Gion Battesta
Hendry Placi
Hitz Toni
Monn Felici
Monn Ignazi
Monn Luis
Soliva Christian

1968

Alig Giusep
Bass August
Berther Christian
Berther Flurin
Brugger Leci
Curschellas Carli
Grisiger Edi
Hendry Gion Aluis
Hendry Placi
Hitz Toni
Loretz Giachen
Loretz Theofil
Lutz Guido
Monn Clemens
Monn Felici
Monn Flurin
Monn Gion Bistgaun
Monn Ignazi
Monn Luis
Pally Ludivic
Schmid Luis
Soliva Battesta
Venzin Theodosi

1992

Bass August
Beer Marius
Berther Emanuel
Berther Flurin
Berther Linus
Berther Placi
Berther Sep Lurenz
Berther Vigeli Giusep
Brugger Leci
Decurtins Hans
Degonda Bernard
Deragisch Daniel
Flury Faustin
Flury Gaudenz
Giossi Teofried
Giossi Vendalin
Grisiger Edi
Hendry Gion Aluis
Hitz Toni
Monn Christian
Monn Ervin
Monn Felici
Monn Flurin
Monn Garbriel
Monn Gion Bistgaun
Monn Guido
Monn Hans
Monn Ignazi
Monn Luis
Monn Renato
Monn Reto
Monn Stanis
Monn Tarcisi
Monn Toni, Rueras
Monn Toni, Sedrun
Monn Walter
Munsch Marcus
Pally Ludivic


Hendry Christian
Pally Vinzens
Schmid André
Schmid Ignazi
Schmid Marcus
Soliva Florentin
Vinzens Norbert
Deflorin Pius (B)
Wäger Daniel (B)

Candidats 1993

Berther Alfred
Berther Roger
Berther Theo
Giossi Armin

7.4 Commembers da noss'uniun ch'ein stai activs per la catscha en autras societads

Monn Felici	1940 – 1943 assessur ell'uniun da catschadurs Muraun
Vinzens Norbert	1977 – 1985 expert cantunal 1979 scret il cudsich "La catscha el cantun Grischun
Monn Guido	1986 – 1992 presidet dils cau-tgira cirquitals
Schmid Ignazi	dapi 1992 president dils cautgira cirquitals
Monn Hans	1993 commember dalla cumissiun da camutschs ella Surselva
Vinzens Norbert	dapi 1993 president dallas uniuns da catschadurs ella Sursleva



Sil Calmut cul guardia-catscha d'avon 50 onns

7.5 Gruppa da cornets da catscha

L'idea ei naschida digl anterius president Ignazi Schmid e dil cassier Emanuel Berther, ils quals han era procurau per la finanziaziun, reussida specialmein tras benefacturs. Onn da fundazjun 1987. Igl intent ei da promover la cameraderia e da realisar cultura da catscha per caschuns specialas da catscha en Tujetsch ed ordeifer. Plinavon vulan ins honorar camerats defuncts cun in salid musical. Igl ei la suletta gruppa da cornets en Surselva. Anteriurs musicants fan oz part da quella gruppa che dumbra 10 commembbers e stat sut la bitgetta da Vinzens Pally. A caschun dalla radunanza generala cantunala dils catschadurs a Glion 1989 ha la gruppa astgau salidar ils delegai cun pliras producziuns.




Gruppa da corns Badus, 1992

Da seniester a dretg: Stanis Monn, Berther Emanuel, Walter Monn, Gabriel Monn, Marcus Schmid, Hans Monn, Giossi Teofrid, Gaudenz Flury, Gion Aluis Hendry, Vinzens Pally

8. Commembers trapassai enteifer quei miez tschentaner



Berther Lucas 1890-1956



Deragisch Emanuel 1882-1968



Loretz Teofil 1925-1975



Schmid Luis 1916-1975




Decurtins Alfred 1915-1980



Berther Christian 1897-1982



Hendry Placi 1916-1986




Loretz Giachen 1915-1986



Monn Clemens 1930-1988



Soliva Christian 1904-1988




Levy Placi 1938-1988




Lutz Guido 1936-1985




Monn Murezi 1928-1991



Monn Ignazi 1916-1992



Monn Felici 1911-1992



Soliva Tin 1936-1993

Ruassei en pasch